

Film vegl ha svegliau emoziuns

Il Forum cultural Tujetsch ha organisau ina notg da film a Sedrun

(anr/hh) **Rodund 150 persunas han assistiu il venderdis all'emprescha notg da film a Sedrun. Il punct culminont da quella ei in film dil senior Tumaisch Monn dils onns 70 davart l'agricultura staus. El ha procurau per bein enqual regurdientscha ed emoziun.** Il Forum cultural Tujetsch s'engascha sin differents secturs dalla cultura en vischnaunca. Novissimamein emprova el era da promover il film, surtut contribuziuns davart quei che cuora e passa enteifer la vallada. Per animar in ni l'auter indigen da s'engaschar en quella direcziun, ha il forum arranschau il venderdis vargau ina notg da film. 150 persunas ein stadas presentas, la gronda part indigenas. Disdiu ha en sesez mo l'aura. Muort quella ha il menaschi stuiu vegnir dislocaus dil plaz-scola en halla da gimnastica a Sedrun. "Ordaviert fuss l'atmosfera segiramein stada pli interessanta ed emperneivla", di il conorganisatur Tarcisi Hendry da Sedrun. Tonaton ein ils organisateurs cuntents cun il decuors da quella emprescha notg da film.

Mussau treis films

L'emprescha part da quei "pign festival da film" ei stada dedicata ad in film dil reschissur Gion Hosang da Mustér. La producziun "La cadeina smaledida" cun ina lunghezia da 13 minutas ha mussau la historia, respectivamein las consequenzas d'ina brev da cadeina. La part principala dalla notg da film ei allura stada dedicata al film en color dil senior Tumaisch Monn da Sedrun. Quei film ei vegnius producius entuorn igl onn 1970 cun la tecnica da super-8. Per saver mussar el a quella notg eis ei stau necessari da copiar el sin DVD. Il film muossa il puesser en Val Tujetsch ils onns 70. Aschia documentescha el ina premiaziun da biestga, la scargada, la lavur e tura dil caver, la zavrada da nuorsas ed era la tecnica da scuder cun ina maschina veglia. Tier bein enqual dils presents han lasdifferentas frequenzas leventau bufatgas emoziuns. Stadas da veser ein numnadamein biaras persunas che han bandunau en quei interval il terrester. "Quei ei ina fetg biala documentaziun che ha gronda valeta", di Tarcisi Hendry. Ella tiarza part dalla sera ei il film "Achtung, fertig, Charlie ..." vegnius mussaus. El ei vegnius tscharnius dils aspectateurs. Treis ulteriurs films ein stai en elecziun.

Cuntinuaziun suonda

Sin fundament dil bien success cun quella emprescha ediziun dalla notg da film vegnan ils organisateurs dil Forum cultural Tujetsch a cuntinuar cun ina semeglionta purschida. "Ils proxims quater onns lein nus porscher ina notg da film duront la stad. Silsuenter vegnin nus a veser, schebein la calamita per ina tala occurrenza ei avon maun", di Tarcisi Hendry. Il concept sco tal cun contribuziuns indigenas ed actualas ei apparentamein secumprovas: "Nus lein mussar vinavon films produci enteifer la val. Quei ei segiramein il scopo principal da quella sera. Cheutras sperein nus era da saver animar ils indigenas da producir films sur d'in ni fauter tema e sector." Medemamein vegnan ils organisateurs ad avisar ina pli stretga collaboraziun cun il turissem. Aschia vulan els confruntar ils hosps da vacanzas cun la cultura dalla Val Tujetsch. Il termin sco tal duei vegnir mantenus: "Schegie ch'igl ei fetg grev d'anflar era duront la stad ina sera senza concorrenza d'auters arranschaments, essan nus dil meini ch'il termin seigi adattaus. Da quei temps constattan era las temperaturas per saver organisar enzatgei aschia ordaviert."